

Uhapšen Amir Zukić

Generalni sekretar Stranke demokratske akcije (SDA) [Amir Zukić](#) uhapšen je danas po nalogu Kantonalnog tužilaštva u Sarajevu. Sa Zukićem je uhapšen i njegov vozač Seid Fazlagić.

„Zukić je osumnjičen za udruživanje radi činjenja krivičnih djela, te primanje nagrade i drugih oblika koristi za trgovinu uticajem“, potvrđeno je Centru za istraživačko novinarstvo u Kantonalnom tužilaštvu. Fazlagić je osumnjičen da je pomagao Zukiću u činjenju krivičnih djela za koja ga Tužilaštvo tereti.

Njih dvojica su uhapšeni u akciji „Bosna“. U istoj akciji su u augustu 2016. godine uhapšeni izvršni direktor u Javnom preduzeću [„Elektroprivreda Bosne i Hercegovine“](#) (BiH) Esed Džananović, te još nekoliko osoba zbog nezakonitog zapošljavanja u „Elektroprivredi“ i drugim javnim institucijama.

Zukića i Fazlagića su uhapsili pripadnici Ministarstva unutrašnjih poslova (MUP) Kantona Sarajevo.

Amir Zukić je generalni sekretar SDA od 2005. godine. Aktuelni je zastupnik u Predstavničkom domu Parlamenta Federacije BiH. Na tu funkciju nije izabran direktno glasovima građana, nego je dobio kompenzacijski mandat.